

四庫全書

史部

欽定四庫全書

萬壽盛典初集卷六十四

歌頌四 大臣三

萬壽頌 有序

經筵講官起居注都察院左都御史兼管翰林院掌院學士事教習庶吉士臣揆叙

臣聞景運方中兩曜之光久照太和在宇四時
之氣先春行健者天至聖法天而不息永貞者
地大君應地而無疆惟德與上下同流斯壽與

清寧合撰故書稱五福先之錫極備徵詩頌九
如首以罄宜戢穀全其理者裕其數彞叙叶乎
箕疇足其實者隆其名謳歌徧乎禹甸若夫巍
巍浩蕩德極於無能名斯乃通復循環壽至於
不可紀槩舉盈數則數衍萬年實指元功則功
侔兩大乾施坤載之象固無媿而不臻日升月
恒之華皆有目所共覩傳紀元於隸首推甲子
於大撓孰能究此貞符揆其洪算者哉欽惟我

皇上

道統三才

心涵萬有

聰明天亶聖神與文武胥全

德業日新祿位與壽名俱永

運璇圖而鼓大化雲行雨施

握金鏡而煥宏猷星羅電耀

朝乾夕惕萃千八百國為一家

盱食宵衣合五十二年如一日書契所載古未之聞
睹記之餘畧陳其槩竊見夫天以一誠為命而
二氣五行效其能聖以一敬居心而八政五紀
歸其極錫萬邦之福典莫隆於享

帝享親垂百代之型道莫備於盡倫盡物

皇上親郊以承

蒼昊既祇飭於齋宮對越之中

祈穀以祝豐年復加虔於用幣薦馨之表

紫壇紺幄事

天即以為民黨耜耒紘

勤民所以足國而且因

心為孝問安視膳之勤修率

祖攸行盛典舊章之恪守謁

園陵而展祀霜露增思侍

長樂以承歡晨昏靡間

勵精圖治當未央而問夜瞻星

倡儉躬行享大奉而浣衣菲食

燭妍媸於明鏡萬象俱涵

權用舍於平衡五材並庀

虛懷以懸鞞鐸每執兩而用中

殊禮以加股肱務循聲而核實授官分職之際必重
斷於

親咨月要歲會之餘時加嚴於保任視羣工為同體豈
文重而武輕訓外吏以率先貴小廉而大法師

師有位和衷以共襄太平謁謁吉人延頸而樂
觀雅化方其舉三雍之禮

道岸先登屈

萬乘之尊儒宮式煥几筵承蓋闕里隆

九拜之儀俎豆加籩考亭躋十哲之列振濂閩之絕
學簪纓下逮其雲仍訪宗派之真傳爵秩廣推
其苗裔敦行崇實

明訓早厲於黌宮廣額開科

特恩海加於士子投戈而嫺齒讓弁伍觀光釋耒而奏
絃歌草節承化道德於是乎一風教於是乎同
乃至

廣廈細旃之上周知稼穡艱難

省方問俗之時宏溥閭閻樂利酌盈虛而通計視周
官國用之餘合遐邇而悉蠲陋漢詔田租之半

發帑動踰百萬雨潤焦枯

賑荒不惜再三雷蘇寒蟄

推恩下施於驛遞寬額旁逮於闕嗇凡此損上益下之
弘規皆屬約已裕民之

至意屢紆

法駕河防永固於淮揚一稟

宸謨水利聿興於畿輔平成攸賴人登衽席之安灌漑
為資家獲盈寧之慶幽風場圃采耕織以繪圖
鈎盾田疇課農桑而下

詔早潦無愆於禱祀春秋不憚於

巡行猶

念愚賤之無知或致桁楊之失入虞廷欽恤三居三宅
之必詳周制寬平八法八議之維慎刑罰措而
畫衣不犯羣安恒性之綏風俗成而比戶可封

共沐

大生之德若夫

聖武性優

神靈天縱

懷仁育義正之畧所向無前

厘除殘戡亂之心有征必克擬金鉦而問罪儼烈火
之燎毛

仗旄鉞而行誅譬衝風之捲籜運九天於掌上如雷
如霆決千里於目前不震不動前者三藩逆命
奉

天威而鯨觀長封後此一隅跳梁奮

乾斷而狼烟立掃版圖式廓提封盡海外之疆沙漠永

清都護拓安西之界鄂羅斯自古不臣之國莫
不來王臺灣府從來未服之區悉皆向化迨乎
橐弓鬻甲

治定功成禮樂以條貫其中和詩書以導揚其美善
事有因而典有創酌損益以昭垂史為緯而經
為經合異同以參考

國書為同文之盛翻譯加詳古文為時藝之宗選裁
獨正旁通聲韻之學清濁協於元音博徵事物

之原鴻纖歸於實據他如文林華什藝苑卮言
莫不薈萃羣書合成全集或冠以

御序如乾象之包六爻或加以

手批若曦光之燭萬景

躬行心得之下一覽無遺

臨朝聽政之間十行俱下尤以數為律本精研於求邊
求角之間律為樂原詳審於陰生陽生之用蓋
自義爻畫卦之後堯典授時以來直窮河洛之

淵源備晰疇圖之象數謂方圓未足以窮函蓋
必推三角以測其端倪謂晷刻未足以周古今
必準五行而驗其節度天文清類纖毫無爽於
列星輿地披圖尺寸不踰乎指掌名一物而源
流具見舉一事而本末胥該良由

質本生安復濟以鈎深致遠

心通翕闢更兼之好古敏求

講幄弘開披琅函而陳性命

經筵時御啟綳帙而闡苞符彙萬理於一中統萬殊於
一貫先天後天之學較若列眉無極太極之幾
洞如觀火溯詞源而探學海直窮六籍之淵源
羅道藪而包義林兼漱羣書之芳潤故能敷

鴻文以宣化鼓盪風雷摛

天藻以成章光昭雲漢

會心呈象皆周情孔思之微

寓物抒懷悉禹鼎湯盤之奧煌煌二典配

御製而成三浩浩三倉推

帝書為第一當

萬幾之稍暇擅八法而兼工宛轉揮毫鐵畫銀鈎之筆
淋漓染翰龍翔鳳翥之形散異采於行間榮光
上燭運化工於掌上逸態橫生而且

腕力萬鈞握弛張於首出

神機千變集聖智於大成黑虎應弦既疊雙而命中騶
虞為節復徹札而穿楊總之

聖心多能遂爾學該游藝備顯仁藏用之德大包宇宙
而靡遺極開物成務之能細入毫芒而無間敷
天之下品類咸亨自古及今光華復旦自非
鴻符駿業咸五而登三

茂實英聲上蟠而下際孰與極可大可久之模裕貞
觀貞明之量也哉茲者昭陽歲紀南斗旦中恭
遇我

皇上誕生開太平之基卜厯周花甲之數於時百昌暢

遂二氣交孚咸披咻噢之和風胥樂綿長之壽
域鵷行鷺序趨朝睽瑞草之班虎士熊臣綰綬
映桃花之色抒誠獻頌旁及乎槐市芹宮額手
歡呼下徧乎黃冠野服或託仙音以致禱絳節
樹於琳宮或假物力以祝釐彩幢湧於寶地以
及譯鞮寄棘望

紫氣者百億大千東西朔南瞻

紅雲者三十餘萬喜

一人之有慶祝

萬壽之無疆要皆發乎至誠本乎至性既無遠而弗屆
亦不召而自來極之趾羽含仁麟遊而鳳舞山
川吐潤玉耀而珠輝正使六樂偕宣八風並扇
河浮丹篆未能臚列嘉祥洛出瑞圖詎足形容
盛美而我

皇上方且

恒以一德

謙而彌光

尊號不居

期物阜民安而壽世休徵是省

願和風甘雨以寧人函夏

照臨益致謹於凝旒端冕穆清

垂拱惟相忘於棟牖松雲皇哉唐哉廣矣大矣臣揆叙

秉質顓愚賦材譾薄備員省闈舉家叨養之

恩竊祿卿班仍世荷

生成之力欣逢

聖誕莫罄頌私竊效蒼舞而塗歌聊用管窺而蠡測淵
鱗仰沫輒伸踴躍之誠巢翼翔庭用遶翮飛之
樂謹拜手稽首而獻頌曰

聖人秉厯體德於乾纂承

烈祖昭事

上天醇風覃被

文命遐宣永清大定軼後超前

具一

天錫

智勇

帝德廣運明物察倫用中好問唐虞事功洙泗義蘊爰

集大成昭垂典訓

其二

迺闡性道迺覺顓蒙詩書重煥聖賢是崇

奎章宸翰開闢鴻濛式我

帝訓一道同風

其三

人遊禮園家翔義圃負笈橫經什什伍伍周旋

折旋中規中矩何以化之辟雍鐘鼓

其四

堯茨不翦禹膳無珍匪徒崇儉實以惠民春耕

秋斂沐浴

皇仁衆維魚矣室家溱溱

其五

古亦有言知人則哲梁棟榑櫨其蓄其柵引見
於

廷廣淵澄澈

明目達聰四門胥闕

其六

金鏡既清玉衡斯平登三道合明兩化行九疇

式序萬物由庚日用徧德以綏我氓

其七

煌煌禹蹟今古罕匹喬嶽懷柔百神受職人慶

那居波無汎溢海晏河清一勞永逸

其八

時邁省方

翠華南下瑞靄扶輪榮光翊

駕有租斯蠲有罪斯赦戶戶羔豚村村桑柘

其九

好生之德涵育生靈原情揆義按律準經

仁同祝網

恩邁占星罰以止罰刑期無刑

其十

文德光昭

武功丕烈一怒安民雷轟電掣梟獍蕩除櫓槍掃滅

泰階以平海外有截

其十一

柔遠能邇道洽無垠當空日照萬象熙春來重

九譯去備四賓行人歲款殊域悉臣

其十二

上苑鳳鳴液池魚躍日映

山龍風廻笙鶴履泰持盈席豐處約

禹儉湯仁與民偕樂

其十三

太和保合元氣充盈根荄畢遂品物咸亨嘉禾

九穗神草千莖不言所利無為而成

其十四

時際昌期天開長晝朗朗瑶樞輝輝

御宿劍佩雲翔共球輻輳會同有繹為我

皇壽

其十五

我

皇之壽與時循環周而復始孰測其端合三千界歷億

萬年同瞻

舜日永戴

堯天

其十六

萬壽頌有序

日講官起居注翰林院掌院學士禮部侍郎教習學士加一級臣湯右曾

欽惟我

皇上作君作師至神至聖臨御萬國於茲五十二年如天之燾如地之容如日月之照臨如雨露之濡潤五辰以撫庶績以凝羣生阜安萬類咸若協和之氣溢為豐穰仁壽之風覃於動植綢繆煦嫗之象信而有徵貞恒悠久之符衍而無極

景命之申重眷佑長綿百福之祥寰區之愛戴謳歌齊上
萬年之頌振古以來所未有也蓋

皇上以生知安行之至德兼存誠主敬之實功無一事
不上合乎

天心無一念不下周乎民隱自內達外自近暨遠自微之
彰自鉅及細兼綜條貫淵密周詳以自強不息
之精神為久道化成之事業雖高深難於窺測
而臣庶亦共睹聞有如

禋郊饗

帝則歲必親行

祈穀佑民則典恒再舉恢

列聖之鴻緒肅四時之薦馨孝養

慈闈靡間於昏定晨省優隆

王室每篤於庸勲展親

勵明作者曰勤求衣問夜

移風俗者維儉菲食卑宮

聽覽萬幾裁決悉歸於盡善

權衡庶政推行一出以大中

御製臺省之箴廣開言路

廷見州縣之吏式勸官方器以使人小大咸蒙收錄公
能服物文武何分重輕勅法以敎官邪獎廉以
課吏最始終全護曲垂求舊之恩中外寅恭共
稟和衷之訓片言可紀必兼採而無遺一節偶
瑕俾自新而不棄

達聰明目人一見而盡識其生平

國典朝章事歷年而脩詳其本末萬里以外周知若
咫尺之前百世而遙逆覩在誠明之表凡此

聖神之天縱皆由敦敏之性成乃若崇尚儒風昌明聖
道舉大學三雍之禮早傳

親政初年崇闕里九拜之儀爭頌

省方盛事孔門諸賢苗裔增五經博士之員朱子正學
淵源躋十哲廟堂之列

詔武人文詞通曉亦與校藝之科

訓士子行學敦崇特廣掄材之額至於勞農勸穡行補助於春秋暑織寒耕繪艱難於圖畫每見隴禾場麥輒悅豫於

天顏倘愆十雨五風必縈紆於

睿慮十行頻下賑恤之詔重重千古未聞放免之租萬萬時勤

清問務察吏以安民一過

宸輿必德洋而恩溥江臯止輦問俗以見百年吳會瞻
雲遮道而呼

萬歲淮揚之汪洋澤國重奏平成畿輔之規度河工用
介稷黍皆

宸謨所獨運後民樂而先民憂亦

膚照之如神捍大患而興大利合黃濁淮清而注海人
慶安瀾東桑乾馬邑之奔流田皆沃壤舉資生
於

帝力共仰戴於

皇慈至若

如天之神特詳於庶獄

好生之德久洽於萬民情苟出於可原必三刺而三宥
罪雖入於不貸猶議緩而議矜重刪律例之條
弘昭寬大之典若夫

統承洙泗集羣聖之大成

道接唐虞冠百王而首出

研經則叅同攷異窮奧義之源流

繹史則綱舉目張示累朝之法戒推數之原出於易
合義文周孔為一人溯律之本肇於圖闡濂洛
關閩所未發

心通象緯羅七曜於胷中

手畫方輿指九州於掌上文章根於義理經乾緯坤比
興本於性情婉雅儷頌

宸毫綰結煙雲卷舒

寶墨淋漓日星昭倬挽萬鈞之全力劃若天開備八法
以洞精妙皆神運教期門羽林之射的必三穿
習春蒐秋獮之儀發皆百中學並該乎游藝
聖燕擅乎多能煥乎

文德之光華允矣

武功之赫濯自三葉肆行背叛勢極鴟張而數年以次
削平威加鯨戮首申察哈爾之明罰迅擊風雷
三征厄魯特之不庭永清沙漠臺灣平而化行

海外紅苗定而氣懾蠻中皆

指授以機宜悉稟承於

方畧先期決策蓋無慮之不詳臨陣摧堅亦有征而
必克鄂羅斯各國咸稽顙而來臣烏斯藏諸番
復款關而職貢幅員廣大真窮地鉅而接天維
聲教遐敷洎一車書而同尉候矣茲者花甲方

周

聖厯禎符悉會

昌辰正

六旬大慶之期當萬福攸同之日卿士舞於廷農夫抃
於野商賈歌於市行旅謳於塗生徒慶於庠軍
卒歡於伍琳宮寶剎祝嘏駢闐綺陌銅街呼嵩
踴躍鮐背兒齒之老扶杖以遠來占風候日之
倫獻琛而畢至咸謂飲和食德胥邀

聖主之生成自茲地久天長永享

太平之樂利所由

至誠感而上瑞臻也乃我

皇上盛德大業有而不居顯號鴻名却而不受每綢繆
於政本用渙汗於

王言謂以億姓安為

一人之安即以庶民福為

皇極之福孜孜上理恒如履薄臨深抑抑虛懷惟期家
給人足俾海隅日出咸喻朝乾夕惕之心凡卜
日諏辰但為歲稔時和之祝此皆

皇上以至誠之實心行至聖之實政淪浹布獲沐浴涵

濡

德意靡所不周

仁恩無乎不徧至矣哉叅天兩地苞符啟矣誠民阜

物功叙歌矣揆文奮武謨烈光矣制禮作樂神

人豫矣稽典籍所紀未罄形容自開闢以來難

為比擬臣右曾材慚侍從職忝論思屢蒙

高厚之恩仰酬無地幸際

升恒之運敬祝

齊天稍抒微詞下申末悃謹拜手稽首而獻頌曰維

皇聖德至誠至仁以育萬物以蕃兆人煦之如日函之

如春寰海四暨罔弗尊親其一

生知安行曰

天子聖好古敏求根心成性

功崇業廣

道隆德盛與三才叅持四時柄其二

祀虔對越孝通神明

躬是顯懿衡正階平克勤克儉求寧觀成

萬幾時勅百度維貞

其三

勗爾有官小大咸秩夙夜匪懈惟和惟一旌庶

懲貪黜華崇實明庶以功萬里周悉

其四

大澤汪濊乾奧坤區士歌黷序民舞康衢屢豐大有多

泰多稔猶

念民依賜億萬租

其五

時巡肇舉咸歌

帝力淮黃安流畿輔滋殖行慶施惠爰及九域欽哉祥

刑

好生大德

具六

蔚矣

天藻炳於日星詩備四始文成六經筆參造化品物流

形軒圖義畫萬禩式型

具七

既敷乃文復奮乃武東西朔南臨以玉斧威行

德服拓不毛土萬方殊庭若在堂廡

其八

用介景福用集繁釐自

天眷佑罄無不宜卿雲晝靄甘露晨滋綿

至聖歷永太平基

其九

弧南一星煌煌於斗甲子循環乾坤悠久數天
之下咸拜稽首

龍德健行

天子萬壽

其十

萬壽盛典初集卷六十四

欽定四庫全書

萬壽盛典初集卷六十五

歌頌五 大臣四

萬壽詩

五言律十二首
有序

經筵講官戶部左侍郎加一級

臣王原祁

臣以凡庸謬膺寵遇恭逢

聖壽冀展愚誠

黼黻依光敢附華蟲而作繪苞符呈瑞希同龍馬之

負圖末綴蕪辭上申

華祝其數取十二者竊效虞書之封秩十有二山衍
皇極之干支十有二萬云爾

嵩岳齊天

喬岳首維嵩巍巍作鎮雄一峯高在上億載屹
居中峻極天關迥恒齊

聖壽崇祝釐騰萬歲率土頌聲同

蒼嶺雲松

嶺高懸紫翠松茂蔭峻嶒濤捲風聲合根盤露
氣凝雲霞成組繪日月竝升恒遠邇齊翹首叅
天最上層

仙館雲泉

暖風開館宇瑞靄接蓬瀛雲斂重霄淨泉涵萬
象清青山恒不老綠樹自長生髣髴聞仙籟時
和鳳鳥鳴

山莊豐樂

農事因時節耕餘聽鳥歌所欣春浩蕩相與舞
婆娑花柳村村接風光日日和大田多稼樂
聖世湛恩波

春山布澤

膚寸春雲合氤氲出翠微舉頭山靄靄轉瞬雨
霏霏潤及寰中徧甘從樹杪飛乘時施大澤

天意念民依

桃源日永

雲山阡陌沃四面少風塵人樂舒長日花明爛
熳辰溯源皆活水接地盡陽春

聖化隨方滿年華萬載新

層岡晴碧

曉色標雲漢晴光轉翠屏居高明自遠歷久氣
常青地厚人煙古春多草木馨岡陵堪獻壽拜
舞向彤廷

溪亭春霽

清晏時光好溪山簇衆芳
熙熙韶景麗灩灩碧流長
俗美因豐歲居安賴

聖皇茅簷春酒熟願進萬年觴

關山煙霽

一統昇平日千山氣象開
青雲隨日上紫氣自天來
春度關門柳晴舒驛路梅
方興無遠近到處是蓬萊

金闕松泉

殿閣齊霄際山川繞座前水清恒浴日松古不知年
疊翠千尋嶂跳珠百尺泉願依雙闕下長此戴

堯天

富春春曉

公望留真蹟披圖試一臨

聖朝無隱逸雅化到山林開霽江天勢同春造物心今
時踰漢代歌頌繼元音

和風應律

陽和生玉琯吹萬布春溫草偃皆知德溪平盡
覺暄從容能中節淡蕩自培元共仰時雍盛三
多祝

至尊

聖壽萬年詩

七言律十首
有序

經筵講官內閣學士兼禮部侍郎

臣

蔡升元

伏以

天行不息運元化於洪鈞

聖壽無疆叶昌辰於寶曆車書大一統正際河清海晏

之期宇宙樂同春共申華祝嵩呼之願恭惟我

皇上

參天贊地

邁帝超王

性本神靈更見日新月盛

治登熙皞猶勤旰食宵衣孝思深篤於

宮庭誠惓肅將乎

郊廟允文允武一身兼創守之隆同軌同倫萬國仰

德威之大傳自古不傳之韜畧覺陰符陳筮亦猶行

厥浮詞廓從前未廓之版圖即重譯來朝詎足

方茲駿烈奏安瀾於千載龍馬呈祥消伏莽於

崇朝鯨鯢息浪凡此治功之立效悉由

睿算之如神況府脩事和咸臻上理而省刑薄賦尤堊
皇心爰書必推至再三羣仰好生若帝正賦亦蠲踰千

萬總期藏富于民爾迺

離照方中值五十餘年之景運異風廣被

賜一十九省之全租侯甸要荒無一夫而不獲東西

南朔歷三載而咸周粵夏王補助之施僅傳遊

豫即漢主田租之復未盡蠲除若我

后無窮無盡之深恩實從古未見未聞之曠典為蒼生而惜福豈徒澣濯以朝比古帝之齋居仍是茅茨不剪

躬行儉德節用正所以愛人

親製官箴安民必先於察吏察案與公卿並恤而錄舊褒忠之典并及先臣儒官偕武士俱升而敷奏明試之條不遺一命尊賢崇祀芹宮類璧盡生輝增額開科桂籍瓊林齊戴澤當夫憂勤罔逸

最

厯念乎農桑有時幾務偶閒即

精研乎經史發瑯嬛之秘

摘文則玉振金聲騰奎壁之輝

灑翰則龍翔鳳翥是惟

濬哲文明之聖乃致康寧富壽之全茲者歲在昭陽天

開壽域律當姑洗人樂康衢八千歲一大春秋

靈根不老六十齡初周甲子寶厯方新載畫本

重三倍覺

體徵剛健坤文兼用六愈知

德合清寧是以器車澤馬之禎紛呈

丹闕獻雉貢葵之衆羅拜

彤墀忭于野舞于廷額手擎觴羣相賀

一人有慶山之陬海之澨駢肩接踵皆不遠千里而來

紺宇琳宮香靄長春之國華燈綵幔光浮不夜

之城盛事重蓬

湛恩彌溥在昔

膺圖首出早矢誠民阜俗之懷迄今久道化成果徵
風動時雍之盛蓋

大聖人規模宏遠本自性生而數十載明且糾虔愈承
天眷巍巍蕩蕩自三代而降漢唐宋無此功德之簒隆奕
奕綿綿即二帝以還夏商周誰比昇平之悠久
臣升元弇鄙庸材單寒下士榮叨

禁地卅年濫廁清華

寵賁兼金三世均
霑浩蕩

錫類既推于祖父

賜居更庇乎妻孥
顧供職多愆常蒙

涵蓋而問心孔疚
徒負

高深每懷犬馬之忱
一飯不忘

黼座忽荷

龍鸞之詔全家再傍
金門矢報無從銜恩
有願願我

皇多福多壽多男子
遠過堯年願我

皇如山如阜如岡陵直逾軒歷敬抒蕪句聊展葵忱
大聖膺符景福綿日華雲爛慶中天無疆

國祚常開泰不已

王心獨體乾蓬海籌初添六十綏山桃正熟三千竹書

不用誇義昊甲子從今次第編其一

功德巍巍亘八荒身兼創守邁前皇洗心革面
遵王路鑒齒雕題隸職方胞與早懷初

踐祚昇平果見永

垂裳須知

聖主勤民切始願於今不暫忘 其二

六十年来法健行

聖躬彌固德彌貞

堯眉舜目添神采禹鼎湯盤益勵精天意欲教民久治

人心實願

帝長生共言遭際勲華代永得蒙庥樂太平 其三

蠲賑恩深久浹膚年来况復

賜全租百千萬億周天渥南朔東西動地呼野老三
時安作息官司終歲罷徵輸自聞曄壤歌衢後
盛事從稽舊史無其四

關心農事切疇咨瑞應先歌多稼詩首善地呈

禾七尺

是年北直稻穗皆高七尺

屢豐歲過麥雙岐

好生最是延年德

行儉無非養福基

德福兼隆天錫祉

遐齡豈止邁期頤 其五

一統車書薄海同
更隆文治振儒風
闡揚正學
心源合升配先賢
禮數崇特闢兩闡
齊入穀每
逢十載徧呼嵩
作人

壽考光雲漢
喜覩離明日正中 其六

記得華封祝

五旬河干獻頌及茲辰

康熙四十二年 聖駕南巡恭進 聖壽萬年頌蒙 褒獎

賜金
上元又啟循環運
初度重逢保佑申
厯算正長

方一甲韶光最好是三春年年中外騰歡日航
海梯山拜

紫宸其七

望道虛懷滄海深愈徵道岸迥千尋

尊稱屢却廷臣表往籍如披座右箴德本性生常晬面
歲增耳順漸從心自茲積算無窮紀萬國呼嵩
總似今其八

矜憐愚魯得投閒忽拜

恩綸復賜環自昔虛慙陪豹尾此生重喜覲

龍顏五年職忝清華地四載神依供奉班最是趨朝剛

介祝康衢處處頌南山 其九

和風瑞日靄千門春暖仙桃引

御樽田野爭來添

景福駕駘何處答

深恩撫心五夜空流汗稽首三辰學負暄常願追隨

鵷侶後年年歲歲祝

義軒其十

萬壽賞兵詩

附

皇上萬壽齊天歲癸巳恭逢

六旬正誕大沛

恩綸普天同慶更加意軍士分遣廷臣頒賞直省綠旗

官兵

臣升元奉

使秦省目覩兵弁歡呼輿情愛戴恭賦軍中樂二十四

首以誌盛事

銜

命西來父老迎千村萬井賀昇平
喧傳盛典真希覲

聖壽今年特犒兵 其一

河山百二地圖雄
勁旅強兵冠宇中
渙汗宣來

三殿詔黃沙
紫塞總春風 其二

敷天大賚首秦關
銖兩都將正賦頒
較昔

西巡恩更遠
新膏萬里到天山 其三

天語煌煌下直廬
按營親要歷村墟
全秦人拜朱提寵

十萬曾無涓滴虛

全秦之兵不下十萬

其四

檢籍呼名里系詳家分戶給徧戎行欲知

帝德難窮處太華山高渭水長

其五

恩波直已過龍堆絕漠春從天上回兕虎熊羆

齊手額歡呼動地一聲雷

其六

原從

仁壽沛宏施不是尋常等攜師北向山呼

天咫尺笙歌一派儼朝儀

每賞軍畢皆北向謝

恩必

君賜昭

盛典也 其七

捧得精鏐馬上歸全家老穉沐恩輝時平豈羨

唐宗事辛苦沙場始賜衣 其八

八郡三邊感切膚千羣萬騎竝歌呼投醪挾纊
傳聞舊我

后深仁振古無 其九

軍營已徧沐

恩綸訓練還傳

誥誠諄一日不教忘武備

天心篤眷是西秦

其十

角弓影抱關山月組甲光生邊塞秋正是

聖朝全盛日軍威到處震遐陬

其十一

竒正方圓陣勢分縱橫變化入風雲軒轅心法

誰傳得指授成謨本

大君

每營賞閱後
皆各演陣法

其十二

白羽瑤弧壓寶刀旌旗簇簇馬蕭蕭縱教名列

賢書貴仍向雲中日射鵬

各營中多有中式武舉仍遵

旨食糧

操演 其十三 武藝

雍雍甲士有文儒豈特赴桓羨武夫韜畧盡從

書卷得古來兵法在孫吳

其十四

況今

聖誕闢恩科械櫟干城竝網羅

壽考作人無二視鼓聲聲裏聽絃歌

萬壽恩科特開文武兩闈近又奉

旨許文武交互 其十五

應試

塞外諸酋久戴

恩聞風絡繹叩旌門環呼

聖德天來大膜拜朝朝禮

世尊

凡榆林寧夏涼州甘肅西寧及洮岷等處番彝聞恩命到時皆叩迎道左備奏感恩之語其

十六

不遠

天威對使星欣逢盛事到邊庭羌絃也效南山曲莫作

伊涼塞上聽其十七

遐邇穹廬總一家風清四塞靜鳴笳書生全未

諳軍旅奉使還勝博望槎

其十八

日覩諸營祝華封瀕行還見整軍容擎觴願藉

皇華使好把愚忱達

九重

每一營賞畢臣臨行時衆兵仍列隊伍携酒肴送至郊外感頌天恩顯臣代奏其十九

吾儕生長在邊荒沙磧難耕賴月糧格外又霑

新雨露從教瘠土亦豐穰

其二十

五十餘年藜養深況承

內府錫兼金彎弓躍馬尋常事未盡酬

恩一寸心 其二十一

鑄得銀牌供佛前感

恩晨夕藝香烟太平時節無由報只祝

君王萬萬年 其二十二

迢遞三秦隔帝臺未能介祉上蓬萊呼嵩猶喜

南山近長戴

堯天作壽杯 其二十三

戢矢索弓百億春

乾行益健益精神每逢十載

恩加渥地久天長戴

聖人其二十四

萬壽盛典初集卷六十五

欽定四庫全書

萬壽盛典初集卷六十六

歌頌六 大臣五

敬頌

萬壽詩 五言排律十二韻

原任經筵講官吏部右侍郎兼翰林院學士銓任臣仇兆鰲

元后星周始陽和

大慶頻海山呈瑞異郡國集臣鄰

耳順聰逾達

心澄悟入神

經筵實學懋

黼座謹言陳

盛世昇平久分年蠲赦均舉安允厲治同樂豈忘民

弗事嵩華頌惟期豐樂臻

淵衷何抑抑

國運倍振振沂水容肥遯鄞江許隱淪金丹顏色駐

宮扇惠風親欲得長生訣蒙

頒至寶珍蕪詞歌下里三祝比封人

萬壽無疆頌有序

原任閣學士兼禮部侍郎纂修歷代紀事年表臣王樞

皇帝御極之五十有二年歲在癸巳春三月恭逢

聖壽六旬於是時也地平天成大化翔洽薄海內外含

生之衆熙熙焉皞皞焉羣遊於太和之世而我

皇上愛養元元之心至深且切未饑也而思食之未寒

也而思衣之田賦頻蠲動逾萬萬又自康熙五

十年始以次全免天下地丁三載一周東西朔

南固人樂康衢戶膺天保矣若我

皇上加意官常則法廉交儆留心造士則涵育熏陶剔
穴搜巖恩尤隆渥茲於三年鄉會常試外特增
萬壽科文武竝舉仍著為例十年一行誠千載希邁之
曠典也且自我

皇上討定三逆以來海隅共服

皇猷天末羣欽

廟畧至厄魯特噶爾丹恃其險遠怙惡不悛斷自

宸衷親統六師以平之西北萬里大小屬國俱獲衽席
之安以及東南域外諸蕃莫不輸誠入貢重譯
來王效嵩呼而恐後猗歟盛哉於是諸王大臣
稽首

九重請上

尊號以塞中外臣民之望勤懇懇至再至三而我
皇上謙冲秉德歆然自下特降

勅諭謂君天下之道惟以實心為本實政為務誇功德

加尊號以取虛名無益治道諸王大臣祇聆

德音悚惕弗勝交相謂曰我

皇上至誠無息博厚高明古無與侔是即膺

鴻號以樂純庥誰曰不宜乃猶堅辭弗受臣等惟有仰

體

聖訓以儆以免於萬斯年長奉昇平之至治爾矣臣之

樞伏而思曰自古帝王如唐虞夏商周歷年永

而在位久者有之而幅員遠遜

今日之廣漢唐宋元明歷年永而在位久如唐虞三代者已鮮而德業復遠遜

今日之隆至我

皇上以天縱之聖益以日新之學凡六經羣史以及象數歷律詩賦書射之藝罔不究其精微造其極至今陽秋周甲猶手不釋卷務扶性天之奧重道崇儒以

君兼師則自生民以來誠為帝王之極軌也文言曰君

子學以聚之問以辨之寬以居之仁以行之君
德也我

皇上之德極其至我

皇上之學極其至也中庸曰故大德必得其位必得其
祿必得其名必得其壽我

皇上德極其至所以諸福畢集受

天眷佑而

聖壽遂與

天齊也周之先曰豳其民忠愛其君之甚故七月之詩有
曰躋彼公堂稱彼兕觥萬壽無疆周宣王時召
穆公既平淮南受王策命詩人美之以為人臣
受恩無可報謝惟言使君壽考而已故江漢之
詩曰虎拜稽首天子萬年況我

皇上御中外一統之世文德武功蟠天際地凡茲臣庶
盡戴生成夫豈風雅所稱得以同日而語而臣
之樞猥以章句小儒仰荷

主知累加拔擢早廁綸扉雖家居猶給筆札

異數殊榮涓埃未報其可以弁陋不文謝風雅而忘揚
於哉謹隨遐邇臣民所共願抒葵藿傾向之寸
心拜手稽首撰

萬壽無疆頌以

獻其詞曰

於惟我

后歷綿鳳紀溯自流虹聿周甲子九譯來王八方同軌

衢歌卷舞以介繁祉 其一

封人稱壽福與之匹載徵五福兼曰好德

聖德日躋乾行無息稽古帝王何美勿集 其二

罔知帝力擊壤興謠我

后恭讓德如唐堯敬

天勤民宵旰忘勞瞻雲就日四序長調 其三

至誠感神事親惟順我

后純孝德如虞舜萱舒蘭殿承歡以敬南風載譜阜財

解慍其四

九河既道孔修六府我

后神智德如夏禹灑沉澹災罔非樂土平成之功巍巍

萬古其五

用人惟己立賢無方我

后好士德如商湯典廣闢門鳳集高岡

臨軒親試特達圭璋其六

惠鮮鰥寡懷保小民我

后怙冒德如周文常平既裕求莫時巡蠲租賜復世徧
如春 其七

無競維烈永綏六宇我

后懷遠德如周武三臨朔漠陰山振旅柝罷玉門中邦
如堵 其八

天降下民作君作師厥統既分我

后一之外王內聖學復孳孳

登三咸五獨贊兩儀 其九

惟學靡倦惟德彌長心周萬里太和洋洋山川
草木發為榮光

一人有慶彌熾而昌

其十

萬邦作貢四海為家符瑞奚陳金玉非華人情
忭豫天意休嘉漏遲春晝醴進流霞

其十一

千官濟濟嵩呼恐後賡歌松柏大椿竝茂天欲
增高地欲增厚

微臣

抒悃以頌

聖壽

其十二

萬壽頌有序

原任內閣學士兼禮部侍郎臣顧悅履

臣聞惟天誕聖以佑民必篤祐多方以著靈長
之慶惟聖繼天而立極必自強不息以昭茂對
之符是以祝三多於華封語從其質歌九如於
天保詞尚其文蓋德盛而百福畢臻化成而大
美咸集理無不驗效有攸全欽惟我

皇上

治懋勲華

道傳精一

秉剛健中正之德

裕聖神文武之猷

敷政寧人日深其乾惕

體元御宇時厯其疇咨奏三捷於采薇修兩階之舞

羽則武功赫也攷藝文於冊府闡理學之淵源

則文教彰也瞻龍翔鳳翥之

宸章函天蓋地誦玉振金聲之

聖製冠古型今官方有箴班聯清矣而更重封疆之選
士行有訓宮牆肅矣而尤嚴衡鑑之司河水安
瀾仰

皇謨而底定版圖式廓欣

天運之熾昌廣恤下之仁而

溫綸大播宏好生之德而

解澤旁敷軫念農功萬國之雨暘入告勤求民隱九秋

之斂獲其咨重蓋藏則一省而蠲租者數載宏
博濟則三年而賜復者一周膏露霑濡浹於茅
簷蔀屋仁風煦拂極於海澨山陬安愈圖安
一人獨勞而萬民共享其逸治益求治羣臣不易而
至尊先任其難推兢業之

天心雖海晏河清不欲隆稱夫瑞應合尊親之衆志即
衢歌巷祝莫能仰荅夫

高深澤媚山輝忻遇陽春之令序風和景麗恭逢

聖誕之嘉辰花甲初周率土上升恒之頌靈椿正茂敷
天抒拜舞之忱慶今茲之五十二年恩流九域
覩方來之萬八千歲歷竝三皇白叟黃童爭扶
携而嵩呼

闕下窮荒絕漠咸重譯而雀躍

堦前南極星輝燭榮光於閭闔條風律應飄仙樂於
鈞天雲漢昭回曠典開而多士常親壽域燠寒
時若豐年兆而羣生同躋春臺闕百王未有之

模錫萬禩無涯之福此真熙熙皞皞億兆之所
難名蕩蕩巍巍羣工之所莫贊者也臣悅履職
叨侍從躬降昌期昔伏衡廬共黔黎而頌祝今
依

廷陞瞻紫氣以趨蹌慶

聖壽之綿長情深燕喜覲

天顏於咫尺心切葵傾謹拜手稽首而進頌曰

皇帝建極膺圖受命運啟中天授時齊正允釐百工撫

綏九有

至貴至尊得名得壽

聖德高深乾行坤載恭默凝神包函宇內

聖功巍煥績底平成體元贊化式定章程

聖文天授龍章鳳藻典謨煌煌昭宣至道

聖武化神威宣千羽八極來廷羣黎安堵烏弋黃支雕

題鑿齒航海梯山驗封成市吏清刑措禮中樂

和綸才育士教洽菁莪黨耜紺轅籥吹豳雅皞

皞三農深耕綠野養老懷幼蠲租賑饑

省方問俗

宵旰民依介以繁祉有秩斯祐時雨時暘多黍多稌泰
階昇平民安物阜瑞應嘉祥符徵悠久躋登仁
壽東西朔南洪庥遠被和氣同含時際陽春光
風和暢柳拂龍池花明仙仗恭遇

聖壽初周甲子中外騰懽臣隣志喜

堯眉舜目天表壽徵喬松彭羨奚足比稱嵩嶽連呼芝

英層綴星現老人雲成

萬歲筵開瑤殿桃熟三千日臨金掌露湛珠圓東海添
籌南山進酒白鹿青麟羣遊郊數鶴髮鳩筇殷
勤三祝鳧藻泮芹敬賡百祿變龍鵠鷺對揚

天休榮瞻

絳闕紫氣濃浮八荒拜舞共球萃止萬福攸同川湧

山峙

聖壽天長覆幬無極保合太和健行不息

聖壽日新枝幹迴旋興圖永鎮鳳歷長延稽古三皇三
才兆始淳穆無為壽以萬紀我

皇功德遠超古聖於萬斯年

一人有慶海晏河澄恩洋溢澤詠膏瞻雲就日

皇風浩蕩

帝治光昌

微臣

作頌

萬壽無疆

萬壽盛典初集卷六十六

欽定四庫全書

萬壽盛典初集卷六十七

歌頌七 大臣六

恭賀

萬壽大慶詩

五言排律五十韻
有序

原任內閣學士兼禮部侍郎 臣 楊瑄

蓋聞道侔易簡常操化育之權德備生成永作
清寧之宰邇天人之交合屢著嘉祥推理數之

相因疊彰誠感瑤圖綿遠實由昭受之功鼎祚
宏長咸出自然之應廣稽聖牒歷誌禎符若夫
法乾元之行健至誠所以無疆秉上帝之好生
仁者於焉必壽斯又軼炎超昊包瓊駕軒膺景
命之維新中外同深愛戴荷天庥之渥至臣民
共慶昇平者也欽惟我

皇上

至德體元

宏勲開世

七政齊而八風叶

五行叙而六氣調

禮樂文章新亘古未新之制作

東西南朔擴從來未擴之輿圖

仁恩沛而肆赦蠲租登兆人於衽席

愷澤敷而賙饒賜帛躋部屋於春臺績奏平成河清

海晏化隆參贊物阜民安博觀黎庶之情無求

不給遐考簡編所載有美必包茲逢五十二年
恭遇六旬

萬壽當百物彙昌之候正三陽開泰之時先因八表之
歡心肇舉一時之曠典

特增闡試廣羅天下蒸髦大闢賢關永著千秋令甲時
則四方來賀萬福攸同黃道呈祥嵩嶽效三呼
之祝

紫微凝極箕疇錫五福之徵岐麥嘉禾坤瑞竝陳於王

會寵眉秀髮耆英畢集於大廷慶滿寰中聲洋溢海外復申

巽命益示

謙冲念撫世以誠民必圖實政欲祈天而永命無事繁詞惟萬姓之恬熙即

一人之福履五風十雨乃是休徵老安少懷斯稱上治羣服

皇言之大彌欽

帝德之深同日月之升恒光如初旦竝乾坤之幬載功
不能名溯鳳紀而莫京洵龍編所未有臣瑄向
叨侍從尤沐光華久霑

高厚之洪慈未展涓埃之微悃仰瞻

黼座頌

寶算之日新肅拜

彤墀覩

聖顏之有喜祚更綿乎周厯願歌天保之九如世適際

夫

堯年擬效封人之三祝謹拜手稽首而獻詩曰

壽歷迎禧日

皇躬介祉辰斗樞符電繞華渚協星陳

御籙通三極

垂衣仰一人書禎呈洛水圖瑞獻河濱經緯兼文武生

安壇聖神

宮闈崇孝養

郊廟肅明禋精一心源密和平政事醇訏謨常秩秩典禮
具彬彬府事歌惟叙明良契自真懷柔馨烈茂
昭格恪誠伸久道

宸猷布同風王路遵

萬幾深自勅百職凜維寅治厯璣衡正明時節序均

龍章輝琬琰芝翰燦瑋璘東壁開書庫西清集侍臣宣

威三葉靖奮武九邊馴帷幄抒方畧封疆拓廣

輪導河旋底績問俗展時巡輯瑞延羣牧求寧

軫兆民

恩覃十五國帑給萬千緡壤賦蠲除數科條肆眚頻流
膏隨處渥行慶與年新師濟饒賢俊蒐羅及隱
淪山林邀賞鑒翼序荷陶甄黎獻咸登進者英
倍撫循遐陬歸有極懿德暢無垠就日烏蠻服
趨風象卉悛騰懽傾衆志章教式羣倫丕冒乾
坤大宏施雨露勻昌期逢令節曉漏報司晨韶
景方三月

璿編始六旬列星環拱衛

雙闕峙嶙峋嶽遠俱修貢川長竝效珍露華金掌淨

符色泰階純采覩

堯翁近光瞻

舜目親殿煙籠綵葩庭旭耀華紳備見休徵洽重看景

命申

淵衷彌抑抑

天語更諄諄祗願人胥樂惟期俗盡淳泰寧同海宇豐

稔徧郊畝厚意涵洪澤殷懷發至仁
微臣叨侍從自昔被

溫綸玉署依僊籙

鑾輿望後塵罷閒歸櫟社祝嘏覲

楓宸芹獻偕農叟鳥趨綴

禁闥山桃紅漫漫苑柳綠蓁蓁
閣欣瞻鳳遊郊喜

見麟衢歌傳擊壤里句叶吹豳應地縣

鴻運齊天秉大鈞貞元周復始億載慶長春

欽定四庫全書

卷六十七

聖壽同天頌

有序

原任內閣學士兼禮部侍郎今草職

臣宋大業

臣聞邃古肇命之主首出庶物傳有天靈治萬
八千歲尚矣書契既作帝王世紀具載炎帝黃
帝少昊顓頊帝嚳帝堯殷太戊武丁在位多百
年上下歷歷有徵至若帝舜伯禹晚而受禪殷
湯始為諸侯周文終為西伯武王末而受命雖
皆以聖人登上壽猶未可與正位一統者竝較

其年歲嗣是以降非無英君誼辟乘時撫運而
享國之數可以追五帝而軼三王者循考史乘
寂寥疎濶概未之有見也夫此古帝王久遠盛
蹟豈惟敦龐之代氣運特殊要以御世立極德
茂功隆參天貳地用能誕膺福祿配合無疆禎
祥之兆集元會之期應理數相符非偶然者蓋
閱數千百年而今乃覩

大聖人作焉伏惟我

國家受

天成命

太祖

太宗創造東土

世祖混一區夏治理初定教化方行天乃蘊靈蓄祉篤生
我

皇帝用廓千百國無外之規模羣億萬載無窮之基業
非徒握圖據鼎近踵漢唐宋元明之賢后已也

恭惟我

皇帝陛下至神至聖允武允文寬大包乎覆載明聰耀
乎日月仁慈沛乎雨露威斷肅乎雪霜自古帝
王贊稱所及咸備於

一人之身是以昭德建功無善不臻無美不暢謹為細
繹敢序宏模

皇帝冲齡踐祚仰思

皇考付託重器朝夕祗畏若涉淵冰入朝

太皇太后

皇太后兩宮問寢視膳動遵

慈訓罔敢或違

太皇太后問所欲為有願天下無事人民安樂共享太平

之對春秋有事

太廟祿鬯執爵懋致孝享外而

園丘卜郊農祥祈穀肅將壇壝嶽瀆神祇古先聖賢類遣
重使祭告尤念勝國陵寢命官祠守戒戍松柏

此古帝王率祖奉親懷神繼代之鴻圖也始總
萬幾太阿在手姦宄立除於時滇蜀未附折衝
萬里以次削平其後進藩拒命煽動三方坐運
籌畧遂定六詔收百粵拔七閩獻俘檻囚駢磔
於市逋寇阻島乘間搪突乃鼓巨艦凌洪濤遂
搗其窟穴鯨鯢悉靖已而朔漠遊魂跳梁邊境
乃秉旄仗鉞統師親征不崇朝而追奔獲醜妖
氛蕩滅龍沙狼望之野牧馬無聲其餘塞下屬

國稽顙朝會天下幅員之廣山盡西北海盡東南跨越乎歷代此古帝王誅黎放兜叙戎貢旅之偉烈也子惠下民痼瘵在體薄稅斂均徭役勸農桑繪耕織之圖以時

省覽四方官吏入覲輒問天行雨暘土物豐歉

賜天下民租或全或半前後無虛歲近復

恩綸疊沛三年之內通免天下地丁銀兩三千二百六

萬有奇凡司寇讞囚屢停秋決或予肆赦嘗謂

守令親民官每謁選出必引見甄別其賢否陞
見督撫監司諄諄

訓誥惟以察吏安民為務此古帝王重農散財泣罪慎
罰之篤意也內外文武任用必得其人其廉吏
正士雖負瑕被譴每加拂拭或擢不次之位封
疆守臣時遣家人奏對輒下問起居兼有賜物
尤親重老成謂奉事日久龐眉華髮有故舊之
感又念諸先大臣恩禮殊異且澤及其子孫此

古帝王知人任賢崇耆求舊之休風也作人造
士以興文教鎖闥兩榜賢舍諸生歲漸增額海
內弦誦之聲徧於閭巷間徵博學宏詞以補中
秘又錄工詩善書者供奉

殿廷操觚提槩之士稍名一藝皆爭自鼓舞願進獻
於鴻都石渠之間此古帝王旁求翕受思皇譽
髦之鉅典也崇尚經術表章聖道嘗

幸闕里謁孔子修北面之禮慎選詞臣以備

日講輒親為反覆指示開導

經筵大典舉行無少間數十年如一日每讀儒先性理深契濂洛之旨尤推崇朱子傳註有功世教躋從祀於十哲之次博求天下遺書充叔館閣命各校讐雕鐫頒示來者廣廈細旃乙夜討論弗輟御選歷代古文以資

淵鑑繙閱通鑑綱目凡有關世道者必有闡發評論以昭垂萬世於是海外琉球諸國聞風向化遣

子八

朝執經太學三年肄習更考鍾律稽算數伶倫所不能審隸首所不能計一一研摩務窮其蘊

宮庭晏閒娛情翰墨揮灑入神詩邁唐音書超晉法多

寵賜臣僚家藏珍寶奉為赤刀宏璧此古帝王尊師問道敷文典學之丕光也止戈衅甲不忘武備羽林禁軍常以蒐苗講武於郊甸其外貔虎之雄

師干城之勁卒碁布星羅分守要害之地提鎮
將領受任臨遣必試之騎射罷其疲弱簡其鋒
銳或

賜膳羞衣裘以彰賞勞兜鍪鞬韉之徒因日勤訓練士
飽馬騰又設武科與文科竝行且令行伍通文
墨者亦與其試以盡收天下之材力此古帝王
治兵振旅論將詰戎之遠圖也端拱無為間出
省方觀民巡行天下嘗東至於魯西至於秦北

至於代其南以臨視河工五至於淮遂至於吳
越河決有年既賴

聖謨指授克底厥成塞瓠子之口築宣房之宮其他

鑾輿所過詢疾苦咨風俗斥浮華崇節儉履阡陌屬
耆老布慶施惠膏澤四周臣民瞻仰

翠華多得望雲就日以為幸此古帝王輯瑞執玉封
嶽觀河之勝軌也統而言之自

皇帝在宥庶績咸熙萬邦時又天下含生之屬翬飛蠕

動如躋柏皇如登栗陸淳和景鑠醲郁彪炳固
未易以簡牘臚陳者也德極茂矣功極隆矣於
是天保定爾錫以遐福今康熙五十二年

聖壽始臻六十保躬嚴慎精神彌固於岡陵勤政清明
綱紀益張於寰宇從此歷年永命

萬壽無疆又豈僅上追五帝下軼三王云爾哉恭惟上
壽之日九州六合之人為臣為庶內自華夏外
訖邊徼莫不梯航縻至朝賀於

闕廷之下車馬冠裳之會琛賁玉帛之陳鐘鼓管絃
之奏歌謠賦頌之作環繞輻輳齊拱

皇極猗歟天地亘古昌期之盛也

臣大業竊念先臣德

宜位升端右

臣

兄弟俱備官內外世荷

國恩而臣大業更向直禁近久侍講幄効力邊陲繼

參綸閣

寵遇深厚靡有倫匹今雖放歸田里犬馬戀

主之私未嘗刻忘茲者欣逢

大慶不敢自外於鳳儀麟遊之列謹從邑父老後拜手稽首而為頌曰

粵稽往初大聖上壽由帝迄王五三希有維天生人作之元后眷德鑒功降福斯厚於赫

皇清奉

天立極崛起東邦奄宅中域

皇祖

皇考景命始集如堂其與如雷其殖維我

皇帝穹蒼篤生龍章鳳質生有神靈克仁克孝克寬克
明崇基洪緒是繼是承

踐阼以來天人叶贊政舉風行教施俗變以武之揚為
霆為電以文之敷為星為漢普天以土率土以
臣金甌奠定玉燭調均阜我品物育我烝民沐
膏濡潤振秀含醇濟濟在朝熙熙在野握其權
衡運以陶冶帝驟王馳無躡迹者宜升云亭宜
播韶夏改元至今多歷有年

聖壽開六韋無疆焉太和宇宙人生其間但祈永命悠
久配天四海八方百僚萬姓芳月良辰忻逢

大慶並會

闕廷持觴祝

聖樂響騰歡禮容展敬

帝曰勤哉爾官爾收暨爾有衆遐邇匍匐予豈自恃保

天福祿尚其日慎式副爾祝羣下蹈舞嵩呼迭

進奏賦獻詩義高辭麗臣辱舊史序以頌繫恭

祝延齡歷

萬萬歲



萬壽盛典初集卷六十七